

Safaniyāh

¹ Zail meñ Rab kā wuh kalām qalamband hai jo Safaniyāh bin Kūshī bin Jidaliyāh bin Amariyāh bin Hizqiyāh par nāzil huā. Us waqt Yūsiyāh bin Amūn Yahūdāh kā bādshāh thā.

² Rab farmātā hai, “Maiñ rū-e-zamīn par se sab kuchh miṭā ḍālūngā,

³ insān-o-haiwān, parindōñ, machhliyoñ, ṭhokar khilāne wālī chīzoñ aur bedīnoñ ko. Tab zamīn par insān kā nām-o-nishān tak nahīn rahegā.” Yih Rab kā farmān hai.

⁴ “Yahūdāh aur Yarūshalam ke tamām bāshindōñ par merī sazā nāzil hogī. Bāl Dewatā kī jitnī bhī butparastī ab tak rah gaī hai use nest-o-nābūd kar dūngā. Na butparast pujāriyoñ kā nām-o-nishān rahegā,

⁵ na un kā jo chhatōñ par sūraj, chānd balki āsmān ke pūre lashkar ko sijdā karte haiñ, jo Rab kī qasam khāne ke sāth sāth Milkūm Dewatā kī bhī qasam khāte haiñ.

⁶ Jo Rab kī pairawī chhoṛ kar na use talāsh karte, na us kī marzī dariyāft karte haiñ wuh sab ke sab tabāh ho jāeñge.

⁷ Ab Rab Qādir-e-mutlaq ke sāmne khāmosh ho jāo, kyoñki Rab kā dīn qarīb hī hai. Rab ne is ke lie zabah kī qurbānī taiyār karke apne mehmānoñ ko maḥsūs-o-muqaddas kar diyā hai.”

⁸ Rab farmātā hai, “Jis din main yih qurbānī charhāūngā us din buzurgoñ, shahzādoñ aur ajnabī libās pahnane wāloñ ko sazā dūngā.

⁹ Us din main un par sazā nāzil karūnga jo tawahhumparastī ke bāis dahlīz par qadam rakhne se gurez karte haiñ, jo apne mālik ke ghar ko zulm aur fareb se bhar dete haiñ.”

¹⁰ Rab farmātā hai, “Us din Machhlī ke Darwāze se zor kī chīkheñ, Nae Shahr se āh-o-zārī aur pahāriyoñ se karaktī āwāzeñ sunāi deñgī.

¹¹ Ai maktīs muhalle ke bāshindo, wāwailā karo, kyonki tumhare tamām tājir halāk ho jāenge. Wahāñ ke jitne bhī saudāgar chāñdī tolte haiñ wuh nest-o-nābūd ho jāenge.

¹² Tab main charāgh le kar Yarūshalam ke kone kone meñ un kā khoj lagāūngā jo is waqt baṛe ārām se baiṛhe haiñ, khāh hālāt kitne bure kyon na hoñ. Main un se nipaṭ lūngā jo sochte haiñ, ‘Rab kuchh nahīñ karegā, na achchhā kām aur na burā.’

¹³ Aise logoñ kā māl lūṭ liyā jāegā, un ke ghar mismār ho jāenge. Wuh nae makān tāmīr to kareñge lekin un meñ raheñge nahīñ, angūr ke bāgh lagāenge lekin un kī mai pienge nahīñ.”

¹⁴ Rab kā azīm din qarīb hī hai, wuh baṛī tezī se ham par nāzil ho rahā hai. Suno! Wuh din talkh hogā. Hālāt aise hoñge ki bahādur faujī bhī chīkh kar madad ke lie pukāreñge.

¹⁵ Rab kā pūrā ghazab nāzil hogā, aur log pareshānī aur musibat meñ mubtalā raheñge. Har taraf tabāhī-o-barbādī, har taraf andherā hī andherā, har taraf ghane bādāl chhāe raheñge.

16 Us din dushman narsingā phūnk kar aur jang ke nāre lagā kar qilāband shahron aur burjon par tūt paṛegā.

17 Rab farmātā hai, “Chūnki logon ne merā gunāh kiyā hai is lie main un ko baṛī musibat meñ uljhā dūngā. Wuh andhon kī tarah taṭol taṭol kar idhar-udhar phirenge, un kā khūn khāk kī tarah girāyā jāegā aur un kī nāsheñ gobar kī tarah zamīn par phaiñkī jāeñgī.”

18 Jab Rab kā ghazab nāzil hogā to na un kā sonā, na chāñdī unheñ bachā sakegī. Us kī ghairat pūre mulk ko āg kī tarah bhasm kar degī. Wuh mulk ke tamām bāshindon ko halāk karegā, hāñ un kā anjām haulnāk hogā.

2

Hosh meñ Āo!

1 Ai behayā qaum, jamā ho kar hāzirī ke lie kharī ho jā,

2 is se pahle ki muqarrarā din ā kar tujhe bhūse kī tarah uṛā le jāe. Aisā na ho ki tum Rab ke sakht ghusse kā nishānā ban jāo, ki Rab kā ghazabnāk din tum par nāzil ho jāe.

3 Ai mulk ke tamām farotano, ai us ke ahkām par amal karne wālo, Rab ko talāsh karo! Rāstbāzī ke tālib ho, halīmī dhūñdo. Shāyad tum us din Rab ke ghazab se bach jāo. *

Isrāil ke Dushmanon kā Anjām

4 Ghazzā ko chhoṛ diyā jāegā, Askqalūn wīrān-o-sunsān ho jāegā. Dopahar ke waqt hī Ashdūd

* 2:3 Lafzī tarjumā: chhupe rah sako.

ke bāshindon ko nikālā jāegā, Aqrūn ko jaṛ se ukhārā jāegā.

⁵ Krete se āi huī qaum par afsos jo sāhilī ilāqe meñ rahtī hai. Kyoñki Rab tumhāre bāre meñ farmātā hai, “Ai Filistiyon kī sarzamīn, ai Mulk-e-Kanān, main tujhe tabāh karūnga, ek bhī bāqī nahīn rahegā.”

⁶ Tab yih sāhilī ilāqā charāne ke lie istemāl hogā, aur charwāhe us meñ apnī bheṛ-bakriyon ke lie bāre banā lenge.

⁷ Mulk Yahūdāh ke gharāne ke bache huon ke qabze meñ āegā, aur wuhī wahān charenge, wuhī shām ke waqt Askqalūn ke gharon meñ ārām karenge. Kyoñki Rab un kā Ḳhudā un kī dekh-bhāl karegā, wuhī unheñ bahāl karegā.

⁸ “Main ne Moābiyon kī lān-tān aur Ammoniyon kī ihānat par ḡhaur kiyā hai. Unhon ne merī qaum kī ruswāi aur us ke mulk ke ḡhilāf baṛī baṛī bāteñ kī haiñ.”

⁹ Is lie Rabbul-afwāj jo Isrāil kā Ḳhudā hai farmātā hai, “Merī hayāt kī qasam, Moāb aur Ammon ke ilāqe Sadūm aur Amūrā kī mānind ban jāenge. Un meñ ḡhudrau paude aur namak ke gaṛhe hī pāe jāenge, aur wuh abad tak wīrān-o-sunsān raheenge. Tab merī qaum kā bachā huā hissā unheñ lūṭ kar un kī zamīn par qabzā kar legā.”

¹⁰ Yihī un ke takabbur kā ajr hogā. Kyoñki unhon ne Rabbul-afwāj kī qaum ko lān-tān karke qaum ke ḡhilāf baṛī baṛī bāteñ kī haiñ.

¹¹ Jab Rab mulk ke tamām dewatāon ko tabāh karegā to un ke rongṭe khare ho jāenge. Tamām

sāhili ilāqon kī aqwām us ke sāmne jhuk jāēngī, har ek apne apne maqām par use sijdā karegā.

¹² Rab farmātā hai, “Ai Ethopiyā ke bāshindo, merī talwār tumheñ bhī mār ḍālegī.”

¹³ Wuh apnā hāth shimāl kī taraf bhī baṛhā kar Asūr ko tabāh karegā. Nīnwā wīrān-o-sunsān ho kar registān jaisā khushk ho jāegā.

¹⁴ Shahr ke bīch meñ rewaṛ aur dīgar kāī qism ke jānwar ārām kareñge. Dashtī ullū aur khārpusht us ke ṭūṭe-phūṭe satūnoñ meñ baserā kareñge, aur janḡlī jānwaroñ kī chīkheñ khīrkiyoñ meñ se gūñjeṅgī. Gharoñ kī dahlīzeñ malbe ke ḍheroñ meñ chhupī raheṅgī jabki un kī deodār kī lakaṛī har guzarne wāle ko dikhāi degī.

¹⁵ Yihī us khushbāsh shahr kā anjām hogā jo pahle itnī hifāzat se bastā thā aur jo dil meñ kahtā thā, “Maiñ hī hūñ, mere siwā koī aur hai hī nahīñ.” Āindā wuh registān hogā, aisī jagah jāhāñ jānwar hī ārām kareñge. Har musāfir “Taubā taubā” kah kar wahāñ se guzaregā.

3

Yarūshalam kā Anjām

¹ Us sarkash, nāpāk aur zālīm shahr par afsos jo Yarūshalam kahlātā hai.

² Na wuh suntā, na tarbiyat qabūl kartā hai. Na wuh Rab par bharosā rakhtā, na apne Khudā ke qarīb ātā hai.

³ Jo buzurg us ke bīch meñ haiñ wuh dahārte hue sherbabar haiñ. Us ke qāzī shām ke waqt

bhūke phirne wāle bherī'e haiñ jo tulū-e-subah tak shikār kī ek haḍḍī tak nahīn chhoṛte.

⁴ Us ke nabī gustākḥ aur ḡhaddār haiñ. Us ke imām maqḍīs kī behurmatī aur shariyat se ziyādatī karte haiñ.

⁵ Lekin Rab bhī shahr ke bīch meñ hai, aur wuh rāst hai, wuh be'insāfī nahīn kartā. Subah basubah wuh apnā insāf qāym rakhtā hai, ham kabhī us se mahrūm nahīn rahte. Lekin bedīn sharm se wāqif hī nahīn hotā.

⁶ Rab farmātā hai, “Maiñ ne qaumoñ ko nest-o-nābūd kar diyā hai. Un ke qīle tabāh, un kī galiyāñ sunsān haiñ. Ab un meñ se koī nahīn guzartā. Un ke shahr itne barbād haiñ ki koī bhī un meñ nahīn rahtā.

⁷ Maiñ bolā, ‘Beshak Yarūshalam merā kḥauf mān kar merī tarbiyat qabūl karegā. Kyoñki kyā zarūrat hai ki us kī rihāishgāh miṭ jāe aur merī tamām sazāeñ us par nāzil ho jāeñ.’ Lekin us ke bāshinde mazīd josh ke sāth apnī burī harkatoñ meñ lag gae.”

⁸ Chunāñche Rab farmātā hai, “Ab mere intazār meñ raho, us din ke intazār meñ jab maiñ shikār karne ke lie uṭhūngā. * Kyoñki maiñ ne aqwām ko jamā karne kā faislā kiyā hai. Maiñ mamālik ko ikaṭṭhā karke un par apnā ḡhazab nāzil karūngā. Tab wuh mere saḡht qahr kā nishānā ban jāeñge, pūrī duniyā merī ḡhairat kī āg se bhasm ho jāegī.

Isrāīl ke lie Nāī Ummīd

* **3:8** Ek aur mumkinā tarjumā: gawāhī dene ke lie.

⁹ Lekin is ke bād main aqwām ke honṭon ko pāk-sāf karūnga tāki wuh āindā Rab kā nām le kar ibādat karen, ki wuh shānā bashānā kharī ho kar merī k̄hidmat karen.

¹⁰ Us waqt mere parastār, merī muntashir huī qaum Ethiopiya ke dariyāon ke pār se bhī ā kar mujhe qurbāniyān pesh karegī.

¹¹ Ai Siyyūn Beṭī, us din tujhe sharmsār nahīn honā paregā hālānki tū ne mujh se bewafā ho kar nihāyat bure kām kie haiñ. Kyoñki main tere darmiyān se tere mutakabbir shek̄hibāzon ko nikālūngā. Āindā tū mere muqaddas pahār par maḡhrūr nahīn hogī.

¹² Main tujh meñ sirf qaum ke ḡharibon aur zarūratmandon ko chhoṛūngā, un sab ko jo Rab ke nām meñ panāh leñge.

¹³ Isrāil kā yih bachā huā hissā na ḡhalat kām karegā, na jhūṭ bolegā. Un kī zabān par fareb nahīn hogā. Tab wuh bheṛon kī tarah charāḡāh meñ chareñge aur ārām kareñge. Unheñ ḡarāne wālā koī nahīn hogā.”

¹⁴ Ai Siyyūn Beṭī, khushī ke nāre lagā! Ai Isrāil, k̄hushī manā! Ai Yarūshalam Beṭī, shādmān ho, pūre dil se shādiyānā bajā.

¹⁵ Kyoñki Rab ne terī sazā miṭā kar tere dushman ko bhagā diyā hai. Rab jo Isrāil kā Bādshāh hai tere darmiyān hī hai. Āindā tujhe kisī nuqsān se ḡarne kī zarūrat nahīn hogī.

¹⁶ Us din log Yarūshalam se kacheñge, “Ai Siyyūn, mat ḡarnā! Hauslā na hār, tere hāth ḡhīle na hon.

¹⁷ Rab terā K̄hudā tere darmiyān hai, terā pahalwān tujhe najāt degā. Wuh shādmān ho

kar terī ḡhushī manāegā. Us kī muhabbat tere qusūr kā zikr hī nahīn karegī balki wuh tujh se intahāi ḡhush ho kar shādiyānā bajāegā.”

¹⁸ Rab farmātā hai, “Maiñ id ko tark karne wāloñ ko tujh se dūr kar dūngā, kyonki wuh terī ruswāi kā bāis the.

¹⁹ Maiñ un se bhī nipaṭ lūngā jo tujhe kuchal rahe haiñ. Jo langarātā hai use maiñ bachāūngā, jo muntashir haiñ unheñ jamā karūngā. Jis mulk meñ bhī un kī ruswāi huī wahān maiñ un kī tārīf aur ehtirām karāūngā.

²⁰ Us waqt maiñ tumheñ jamā karke watan meñ wāpas lāūngā. Maiñ tumhare deḡhte deḡhte tumheñ bahāl karūngā aur duniyā kī tamām aqwām meñ tumhārī tārīf aur ehtirām karāūngā.” Yih Rab kā farmān hai.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 1 Oct 2024 from source files dated 20 Sep 2024

123ff8cb-27b3-5817-a02a-22e67145fd30